

## PRESIDEN TRUMAN

Presiden Henry S. Truman, Presiden Amerika

Syarikat yang ada sekarang ini ialah anak kepada seorang penjual kuda di Lamar dizahirkan di sana pada 8 Mei 1884 yang menjadikan umurnya pada masa ini 66 tahun. Pada masa besarnya ia menjadi pekebun. Jawatannya menjadi Presiden itu ialah menggantikan mendiang Presiden Roosevelt pada 21 April 1945 dan menjadi Presiden Amerika yang ke-32. Dalam masa perang dunia yang pertama ia mengambil bahagian dalam medan perang. Namanya kepada kita di sini tidak berapa terkenal tetapi sesudah ia menjadi Presiden dan setelah ia menghadiri persidangan Potsdam (Julai – Ogos 1945) maka namanya pun telah dikenal. Ialah yang telah memberi perintah supaya menggugurkan bom atom di Hiroshima pada 6 Ogos dan mengisytiharkan 16 jam kemudian kepada dunia bahawa atom itu telah digunakan. Dalam pilihan raya menjadi Presiden ia mendapat undian sebanyak 23, 667, 727 undi.

Meskipun Presiden Truman umurnya telah meningkat kepada tua tetapi dengan setua itu tidak pernah tersebut kesihatannya ada terganggu walaupun sehari pada hal bersama-sama dengan masa itu ahli-ahli siasah yang sebaiknya kerap kali mengidap berjenis-jenis penyakit. Menurut kenyataan kesihatannya sekarang lebih baik daripada masa sebelum ia masuk ke Rumah Putih (rumah Presiden Amerika). Sehingga doktor khasnya telah pernah berkata : Penanggungan-penanggungan yang dipikulnya dengan berat sebagai Presiden yang besar itu makin menambah kesihatannya.”

Rahsia kedudukan itu ialah bahawa Presiden Truman

sentiasa tenang, dan sangat gemar kepada jawatannya yang besar itu tetapi beliau tidak membanyakkan berfikir atau berperasaan resah gelisah. Telah masyhur diketahui bahawa beliau tidak membawa bersama kesulitan-kesulitan yang mengenai perkara Amerika Syarikat itu ke tempat tidur, tetapi beliau akan masuk ke tempat tidurnya di dalam lingkungan pukul sebelas malam dan beliau akan tidur mengiring sehingga pukul enam pagi. Manakala bangun dari tempat tidurnya beliau akan meminum air dari perahan limau manis setelah itu beliau akan keluar berjalan kaki sepanjang-panjang tiga kilometer (hampir-hampir dua batu) mengelilingi Rumah Putih (rumah kerajaan) kemudian daripada itu beliau akan balik mengadap makan paginya iaitu “Quaker Oats”, susu dan dua jenis lagi “bacon” dan “toast”.

Setelah ini iaitu pada pukul lapan pagi beliau akan bekerja sehingga zuhur. Setelah makan tengah hari beliau akan tidur seketika. Selepas itu ia akan balik bekerja sehingga pukul tujuh malam. Sesudah itu beliau akan turun berenang di kolam mandinya kira-kira suku jam lamanya, dan setelah itu ia makan malam bersama familiinya iaitu makanan yang tersedia dari daging dan dua jenis sayur. Beliau tidak merokok dan meminum arak sedikit sahaja.

Kehidupan Truman dan familiinya adalah hidup rukun damai, isterinya Lydia Elizabeth Virginia Truman, hanya sepuluh bulan sahaja muda daripada beliau, sekampung dan serakan semasa keduanya bersekolah dahulu, tetapi keduanya tidak menjadi suami isteri melainkan setelah tiap-tiap seorangnya berusia 30 tahun. Lydia Truman seorang ibu yang bijak dan menolong bantu kepada suaminya yang utama, pernah menjadi setiausaha kepada suaminya sehingga beliau menjadi anggota Majlis Tinggi Amerika dan dialah yang membaca akan segala ucapan-ucapan beliau sebelum beliau mengucapkannya di majlis tersebut.


Tuan Truman berasa bangga kerana beliau menurut fikiran isterinya di dalam banyak perkara. Anak perempuannya "Margaret" telah dizahirkan di dalam tahun 1925, menjadi seorang penyanyi, dan pendapatannya di dalam tahun yang lalu telah melebihi daripada pendapatan yang didapati oleh ayahnya(Truman) daripada jawatannya menjadi Yang Dipertua Negara Amerika Syarikat itu.

Tuan Truman sangat berasa bangga dengan keadaan anaknya yang tersebut, kerana beliau sendiri seorang yang cenderung kepada muzik. Beliau biasa memetik lagu-lagu "Show Band" dengan handalnya, dan kerana itu beliau berkata bahawa kejayaan anaknya itu ialah kerana segala nasihatnya di dalam soal-soal kesenian yang sentiasa dihamburkan kepadanya!

#### **Tidak Pernah Bekerja**

Suatu daripada kelebihan Truman ialah beliau tidak pernah bekerja. Beliau tahan menyelidiki di dalam sehari 600 pucuk surat-surat rasmi yang akan ditandatanganinya. Sedang rakan-rakannya yang lain tak dapat bertahan sepertinya. Tuan Burns telah meninggalkan jawatan Menteri Luar kerana kesihatannya telah runtuh, Tuan "Forestal" telah kena penyakit lemah tenaga sehingga membunuh diri, dan sekarang Tuan Dean Achison" sedang mengidap penyakit di dalam perut. Tetapi Tuan Truman tidak mengidap sesuatu apa pun sedang kewajipannya lebih berat daripada rakan-rakannya yang lain!

Ada suatu perkara sekarang yang patut disebut iaitu sahsiah beliau telah bertukar semenjak belia telah menduduki Rumah Putih, kerana terlbih dahulu daripada itu beliau terkenal seorang yang tidak membesarkan diri, tetapi sekarang telah bertukar iaitu beliau bangga dengan kebesaran! Beliau berpendapat bahawa ia lebih mengetahui dan lebih faham akan kehendak rakyat jelata Amerika daripada sebarang orang lain, dan kerana itu beliau tidak sanggup menahan bidasan yang datang dari pihak akhbar dan daripada



*Presiden Truman bersama-sama dengan ahli-ahli siasah yang lain tatkala mengisytiharkan bercakap-cakap sesudah ia, perkara kecerobohan di Manchuria.*

anggota-anggota Senat, dan pada masa ini beliau sangat lemas hatinya menentang sebarang bangkangan yang didatangkan kepadanya!

#### **Kebesaran yang Melebihi**

Peraturan siasah di Amerika tidak membenarkan Presiden Truman bermaharajalela dengan kebesarannya tersebut, dan membidas gerak langkahnya yang memang halal bagi rakyat jelata, dan kerana itu beliau pada tiap-tiap hari menerima kira-kira 3000 pucuk surat yang penuh dengan bidasan-bidasan yang melukakan hati. Orang-orang Amerika tidak berkenan melihat Truman meliputi dirinya dengan kebesaran dan kemewahan yang indah meriah, kerana kedapatan beliau pada masa ini ada mempunyai tiga buah istana yang sentiasa beliau bercengkerama di dalamnya, dua buah kapal terbang, sebuah kapal kecil dan 35 buah motokar serta 225 orang yang berkhidmat kepadanya sedangkan jumlah yang pernah berkhidmat kepada mendiang Roosevelt hanya 35 orang sahaja.

Kemewahan dan kebesaran Truman yang demikian

telah menyebabkan Senator "Roy Woodrock"


menyerang dengan hebatnya. Sudah maklum undang-undang tubuh perlembagaan Amerika membenarkan Majlis Senat memberhentikan kemewahan yang tersebut dengan sekali pangkah dengan pena, dan majlis itu ada berkuasa melemahkan gerakan Tuan Yang Dipertua dengan sepenuhnya, tetapi Tuan Truman masih mendapat sokongan penuh dari segenap peringkat.

Secantik-cantik segi Tuan Yang Dipertua kerajaan

Amerika itu ialah segi kemanusiaannya, beliau sangat baik hati dan tulus ikhlas, ikhlasnya terhadap segala sahabat handainya memang terkenal, dan satu daripada tanda-tanda kemanusiaannya ialah perundingannya terhadap soal orang-orang hitam di Amerika. Beliau sentiasa menuntut persamaan untuk mereka, sehingga beliau terpaksa bertelingkah dengan orang-orang "partinya" di dalam soal ini dan sehingga nyaris-nyaris mereka enggan melantiknya kepada jawatan Yang Dipertua, tetapi beliau telah berdegil mempertahankan pendiriannya yang tersebut dan akhirnya beliau telah berjaya.

Walaupun Presiden Truman pada msa ini dipandang bersifat congkak dengan kebesaran, tetapi beliau masih bersifat lurus, dan kerapkali mengaku akan kesalahannya di hadapan majlis yang ramai. Ini adalah suatu sifat yang besar yang payah boleh didapati menjadi pakaian pahlawan-pahlawan siasah yang sentiasa mereka mengaku bahawa diri mereka adalah berdiri di atas kebenaran selama-lamanya.

Tuan Truman tidak pernah keluar negeri melainkan tiga kali seumur hidupnya yang pertama beliau telah pergi ke negeri Perancis, dan tinggal di sana beberapa bulan, yang kedua ke Potsdam kerana bertemu dengan Stalin, dan yang ketiga ke Pulau Wik kerana bertemu dengan Jeneral MacArthur.



*Gambar Truman di atas ini ialah gambar bersejarah bagi Amerika iaitu tatkala Truman mengisyiharkan kecerobohan Komunis ke atas Korea dan menyatakan bahawa Amerika telah menjadi galang ganti kepada pertubuhan bangsa-bangsa bagi menghadapi kecerobohan itu – gambar USIS.*